



TUSI 'AU LEOLEO

2023



Ia Tatou Tatalo

EKALESIA FAAPOTO POTOAGA KERISIANO SAMOA

UPU TOMUA.

E avatu pea i le Leoleo Sili ma le Lelei le vi'iga ma le fa'afetai, auā o lona Alofa ma lana Pule fa'a-soifua, ua a'e manumalo ai le tatou faigamalaga, mai faigata ma puapuaga o le Tausaga ua tuanai atu, ma ta'ita'i mai ai ma le manuia lo outou soifua ma so matou ola, i le amataga o lenei Tausaga fou.

O le “**Ia Tatou Tatalo 2023**” na saunia e le Susuga i le Faifeau ia Fililagi Toleafoa, o le Ekalesia i Samamea, o le Pulega a Fagaloa, i le Matagaluega a Apia i Sasa'e, le Vaega muamua, mai le masina o Ianuari – Iuni. O le Susuga i le Faifeau ia Tavita Maliko, o le Ekalesia i Lepā, o le Pulega a Aleipata, i le Matagaluega Lepā/Lotofaga/Aleipata na saunia le Vaega faai'u mai le masina o Iulai – Tesema.

E fa'amauina le agaga fa'afetai tele i Susuga i Fa'afeagaiga, ona o lenei galuega taua e fesoasoani ai e fai ma fa'asino ala, i le soifua tatalo o le Ekalesia Aoao i luma o le Leoleo Silisili, auā le lau sasa'aina mai o ana fa'amanuiaga, e manuia uma ai a tatou feau ma galuega.

Ia fa'atasi mai pea le Ali'i o nōnōgāmanū uma lava, i la tatou fōlāuga ma le faigāmalaga. Ia tatou tatalo pea e manuia ai la tatou Malaga o lenei Tausaga fou.

Uili Konelio FS.

EFKS Fa'ala Palauli /Matagaluega Faasaleleaga.

Failautusi.

KOMITI 'AU-LEOLEO

Ianuari 01-07 2023.

Tusi Faitau: Salamo 103: 1 - 5.
Manatu Autū: “IA VI’IA LE ATUA”
(*Bless the Lord*)

Fa’afetai.

O le vi’iga lava ia e fo’i i le Atua, i lana ta’ita’iga ua aulia ai lenei Tausaga fou ma le manuia. E ui e tele fitā o le ala, a e o lana tausiga ua malutia ai le ola. Fa’afetai i lana fa’amafanafanaga a o i ai pea le lalolagi i faigata

Fa’ato’eseaga.

Tatou fa’amaualalo ona o le galo pea ona fa’afō’i o le vi’iga ia te Ia e lē aunoa. Fa’amagalo fo’i ni vaivaiga o lena tausaga tuai.

Mana’oga.

Tatou tatalo ina ia i ai pea lana ta’ita’iga i la tatou folauga amata o lenei tausaga. Tatalo ia mamao ni matagi vale ma peau laga, a ia mapu pea mea uma i ona a’ao.

Ianuari 08-14. 2023.

Tusi Faitau: Hakai 1: 1 - 7
Manatu Autū: “IA SA’O LAU FA’AMUAMUA”
(*Set your priority right*)

Fa’afetai.

Tatou fa’afetai i le Atua i lona alofa ia i tatou i taimi uma, e ui i so tatou fa’aletonu. Fa’afetai ona o le soifua o lona Alo ua o’o mai ai le alofa tele

Fa’ato’eseaga.

Tatou fa’ato’ese ona ua sese la tatou fa’amuamua i mea vaivai o le lalolagi. Ina ua fa’amuamua i tatou lava, a e ama la tatou va’ai i lona finagalo paia

Mana’oga.

Tatou tatalo ina ia manino la tatou va’ai i manuia o le Atua. Ia fa’amuamua pea o Ia i so’o se mea tatou te faia. Tatalo ina ia maua pea le fa’atuatua e ave’esea ai le ola masalosalo.

Ianuari 15 – 21 2023.

Tusi Faitau: Fa’ata’oto 3: 5 - 6
Manatu Autū: “TALITONU I LE ATUA I LE FAIGA MALAGA UMI”
(*Trust in God in journey*)

Fa’afetai:

Fa’afetai i le Atua i ala ua Ia tapena mo le faigamalaga o lenei tausaga. Fa’afetai ona o le Agaga Paia o lo’o tauto’aluaina i tatou i le savaliga o faia nei.

Fa’ato’eseaga:

Tatou fa’ato’ese ona ua tatou fa’amoemoe i lo tatou lava malosi, a e fa’atuatanai le Agaga. Fa’ato’ese ona o ala o le fili, ua tosina ai pea i tatou.

Mana’oga.

Tatalo mo lona filemu e maua ai le mafanafana i taimi faigata. Ina ia fa’atonu folau pea lana Afioga i la tatou folauga o lenei tausaga

Ianuari 22 – 28.

Tusi Faitau: Mataio 4: 18 – 22
Manatu Autū: “O LO TATOU VALA’AUINA MAI LE ATUA”
(*Our calling from God*)

Fa’afetai:

Ona o le amanaiaina o tatou tagata fa’atauvā’ā. Fa’afetai i fe’au ma tiute ‘ese’ese ua vala’auina i ai lo tatou ola. Fa’afetai i lana Galuega tala’i ua pupula ai o tatou mata i lona Silisili Ese.

Fa'ato'esega:

Tatou fa'ato'ese ona o lo tatou le fa'amaoni i lo tatou vala'auina. Ua sa'ilī o tatou lava manuia a e fa'atuatuanā'i le Atua.

Mana'oga:

Tatou tatalo ina ia i ai pea lana fa'amalumaluga a o feagai ma faiva o lenei tausaga. Ia fa'amalosia e lona mana lana 'Au-faigaluega.

Ianuari 29-04 Fepuari 2023.**(Aso Sa o Tupulaga)****Tusi Faitau:** **Luka 1: 39 - 46****Manatu Autū:** **"IA NAUNAU E FA'ASOA LE TALALELEI"**
*(Desire to share the Good News)***Fa'afetai:**

Fa'afetai i le Atua ona o le tala o le Fa'aolataga, ua faamalosia ai le soifua tapua'i. I le sao o tinā ma la latou fa'asoia i le Talalelei.

Fa'atoesega:

Tatou fa'ato'ese ona o lo tatou fiafia e tala'i tala lē aogā a e fa'atuatuanā'i tala e manuia ai. Fa'ato'ese ona o lo tatou te'ena pea o lona vala'au mai i le tele o taimi.

Mana'oga:

Tatou tatalo ina ia fa'aaogaina pea lo tatou fa'atauvā'a i so'o se mea e finagalo i ai lo tatou matai. Tatalo ina ia musuia pea Tupulaga e le Agaga Paia.

Fepuari 05 – 11 2023.**Tusi Faitau:** **Ioane 6: 32 - 35****Manatu Autū:** **"MATELAINA FA'ALEAGAGA"**
*(Spiritual Hunger)***Fa'afetai:**

Fa'afetai i le Atua ona o taumafa fa'a-le-Agaga ma ana fa'amanuiaga e tele mo le tagata. Fa'afetai i le Atua ona o lona

fa'amalieina o lo tatou galala i lona finagalo paia. Fa'afetai i le Atua ona o Iesu le areto o le Ola.

Fa'ato'esega:

Tatou fa'atoese ona ua pupū pea o tatou loto i isi mea. Ona ua tatou fa'atuatuanā'i mealofa mo le manuia o le ola.

Mana'oga:

Tatalo ina ia fa'atuputeleina pea lo tatou fiafia e sa'ilī'ili i ana Afioga Paia. Ia fa'asoia atu ia i latou o mo'omia lea meaalofa.

Fepuari 12 – 18 2023.**Tusi Faitau:** **Ieremia 19: 11 - 14****Manatu Autū:** **"FUAFUAGA A LE ATUA MO I TATOU"**
*(God's plan for us)***Fa'afetai:**

Fa'afetai ona o ana fuafuaga lelei mo i tatou i taimi uma, aemaise le fa'aaogaina o le ola mo ana fe'au. Fa'afetai mo le fa'amoemoe ola mo i tatou i totonu o fitā.

Fa'ato'esega:

Fa'ato'ese ona ua tatou o ese mai i lana fa'asinoga tonu. Fa'atoese ona ua tatou fesiliglia lona finagalo mo le manuia o le tagata

Mana'oga:

Tatou tatalo i le Atua ina ia fa'aaogaina pea lo tatou fa'atauvā'a auā se manuia o lana fanau. Fa'atonutonu folau lona mana i fuafuaga a le tagata.

Fepuari 19 – 25 2023.**Tusi Faitau:** **Mataio 28: 18 - 20.****Manatu Autū:** **"ALU....I FEA?"**
(Go....Where?)

Fa'afetai:

Fa'afetai i lana fa'asinoga mo la tatou galuega i lana Talalelei. Fa'afetai ona o lo tatou vala'auina e fa'aauau lana Talalelei.

Fa'ato'esega:

Fa'ato'ese ona ua tatou toilalo i mailei a le fili. Fa'atoese ona ua tatou iloa ala ua fa'asino mai, a e ua tatou augāfātā e mulimuli i ai.

Mana'oga:

Tatou tatalo ina ia maua'a pea le fa'atuatua, tatou te galulue ai pea ma le fiafia. Tatou tatalo ina ia maua e lana fanau le galulue fa'atasi i so'o se tafa o le vala'auina.

Fepuari 26 – Mati 04 2023.

Tusi Faitau: Salamo 37: 35 - 36.

Manatu Autū: “**FILIFILI LE ALA SA’O**
(Choose the right path)

Fa'afetai:

Fa'afetai i le Atua i le manino o ala e tau i le manuia ua ia a'oa'o mai. Silisili le fa'afetai ona o Iesu le ala tatou te saofāgā ai i lona mālō e fa'avavau.

Fa'ato'esega:

Tatou fa'ato'ese ona o ala o le lalolagi ua fa'aseseina ai i tatou. Ona ua filifili i manuia o le tino a e galo ai le fa'asinoga a le Agaga Paia.

Mana'oga:

Tatou tatalo e foa'i mai le mautinoa e filifili fa'atasi ai ma le Ali'i. Ia fesoasoani mai le Agaga, ne'i o tatou filifili i ala sese.

Mati 05 – 11 2023.

Tusi Faitau: 2 Korinito 12: 10.

Manatu Autū: “**PE A OU VAIVAI ONA OU MALOSI AI LEA**
(When I am weak, then I am strong)

Fa'afetai:

Tatou fa'afetai ona o le malosi fa'afouina tatou te maua pea i taimi e lē taugāmālie ai le ola. O lo o fa'atumauina pea lo tatou malosi i le mana o Keriso.

Fa'ato'esega:

Tatou fa'ato'ese ona ua tatou faiaina pea i lo tatou fa'avaivai. Ona o lo tatou fa'atamala ua afua ai ona tatou to'ilalo ai i le fili.

Mana'oga:

Tatou tatalo ina ia pupula pea o tatou mata fa'a-le-agaga i ana mealofa foa'ifua mai. Tatalo ia fesoasoani mai i lo tatou vaivai, i le feagai ai ma lo tatou Vala'auina.

Mati 12 – 18 2023.

Tusi Faitau: Mataio 6: 27

Manatu Autū: “**AUA LE POPOLE A IA FIAFIA**
(Don't worry, Be happy)

Fa'afetai:

Tatou fa'afetai ona o lana meaalofa o le fiafia e maua e le tagata, o se vaila'au sili i lo tatou ola. Ona o ana Afiofa, e ave'esea ai le popole ma le atuatuvale.

Fa'ato'esega:

Tatou fa'ato'ese ona o lo o maua pea i tatou i le popole ma le fa'alotolotolua. Tatou vala'au ia fa'amagalo lo tatou sa'ili solo, a e tu'u Keriso le fa'apogai o le ola fiafia.

Mana'oga:

Tatou tatalo ina ia maua'a pea le fiafia i le Ali'i, e tupu ai le mautinoa i o tatou loto, e faia ai mea lelei mo lona vi'iga.

Mati 19 - 25 2023.

Tusi Faitau: Salamo 16: 7 - 8

Manatu Autū: “**TU’U LE ALI’I I OU LUMA**
(Put the Lord before you)

Fa'afetai:

Tatou fa'afetai i le ta'ita'iga a le Atua i la tatou folauga ua a'e manuia ai o tatou faiva. Aemaise o ona ala uma ua fa'asino mai, e mulimuli ai le tagata.

Fa'ato'esega:

Tatou fa'ato'esee ona ua fa'amuamua pea i tatou a e lona lua le Atua. Ina ua galo le Atua i lo tatou fa'amoemoe

Mana'oga:

Tatalo ina ia manino pea la tatou va'ai i manuia o le Atua. Ia fesoasoani fo'i i lo tatou vaivai pe a feagai ma faigata o le ola.

Mati 26 – 01 Aperila 2023. Vaiaso Sa o le Laupama.

Tusi Faitau: **Mareko 11: 7 - 10**

Manatu Autū: **"IA MANUIA LE AFIO MAI I LE SUAFA
O LE ALI'I"**

(Blessed is the one who comes in the name of the Lord)

Fa'afetai:

Ona ua tatou matuā iloa ma malamalama i le uiga o le Malaga a Iesu i Ierusalema. Ia manuia lē afio mai i le suafa o le Ali'i.

Fa'ato'esega:

Ona o lo tatou pogisa pea, o Iesu le Tupu o tupu. Ona o lo tatou alalag pea, "Osana!" a e o lo o tatou agasala pea.

Mana'oga:

Ina ia saunia lelei o tatou loto i le malaga mai o le tupu. Faatupuina pea le olioli e vivi'i, ia nofo tupu Keriso i o tatou loto.

Aperila 02 – 08 2023.**Vaiaso Paia**

Tusi Faitau: **Isaia 53: 1 – 5**

Manatu Autū: **"O LE AUAUNA PUAPUAGATIA"
(The Suffering Servant)**

Fa'afetai:

Ona o le manumalo o Keriso i ona puapuaga, o le fa'aaliga o le Alofa Tunoa o le Atua mo i tatou. Ona e ui ina tatou ola i le loloto o le agasala, a ua faia e le Atua le mea sili mo lana tagata faatuatua. I a'oa'oga o le ola auauna na fa'aalia i le soifua o le Ali'i ua fa'aolaina ai i tatou.

Fa'ato'esega:

I le faigata ona avea i tatou ma auauna mo isi. Ona o le ma'ale'ale o lo tatou ola auauna, pe a o'o mai puapuaga ma faigata. Ona o le vaivai o lo tatou ola fa'a-le-Agaga, ua faigata ai ona talia le Alofa Tunoa o le Atua.

Mana'oga:

Ina ia fa'amalosia lo tatou ola auauna i ala o le Ali'i, e ta'uaogaina ai lo tatou fa'atauva'a. Ia tatou iloa ona sa'ilili mālō i ala maulalo, ma ia faia ma auauna fa'amaoni. Ia tatou manatua ma le loto fa'atuatua le Faaolataga tele na faia e le Atua, e ala ia Iesu Keriso.

Aperila 09 – 15 2023.

Tusi Faitau: **Ioane 21: 1 - 11**

Manatu Autū: **"O LO O FAATALI MAI LE ALI'I TOETU
MO 'OE"**
(The risen Lord awaits you)

Fa'afetai:

Fa'afetai i le Ali'i Toetū na te aumaia le mautinoa i o tatou ituaso lē mautonu. Auā o lo o lava ma totoe, e toe totogo ai so'o se fa'amoemoe ua 'asa i le masalosalo. O lona toetū ua toe fa'atumuina ai lo tatou gaogaoi'i fa'a-le-agaga.

Fa'ato'esega:

Ona o lo tatou ola masalosalo i le Ali'i toetū. Ona o le ola femoumoua'i e mafua mai i le leai o se fa'atuatua. Ina ua tatou lē fa'amoemoe i le Ali'i i le fa'atinoina o tatou faiva.

Mana'oga:

Tatalo mo lona fa'atasi mai e aveesea ai le popole vale i le fa'atinoga o lo tatou Vala'auina. Ia sasa'a mai lona mau mo i tatou a o alo faiava i fe'au o le ola. Ia foa'i mai mea e tatau mo le aso.

Aperila 16 – 22 2023.

Fa'afetai:

Fa'afetai i le Atua ona o tupe ua o tatou maua e tautua ai lana Galuega. Fa'afetai i lona tamaoaiga fa'asoa mai, o le ata manino lea o lona alofa lē māvae.

Fa'ato'esega.

Tatou fa'ato'e se ona o lo tatou lima mau e foa'i mo le Atua. Tatou fa'amaualalo ona o lo tatou mana'o tele.

Mana'oga:

Tatou tatalo ina ia tupu tele le fiafia e fai le mea sili mo le Ali'i.
Tatalo ina ia o tatou aogā mo le attiina'eina o le Galuega a le Atua.

Aperila 23 – 29 2023

Tusi Faitau: Iakopo 1: 22 - 23
Manatu Autū: “O E USITAI I LE UPU”
(Doers of the Word)

Fa'afetai:

Tatou fa'afetai i le Atua ona o le fa'aaogaina o i tatou e fai ma mea faigaluega o le UPU. Ia vi'ia le Atua ona o tagata fa'alogo ma usitai i le UPU.

Fa'ato'esega:

Tatou fa'atoese ona o le leaga o le fa'alogo ua lē lagona ai le Upu a le Atua. Ona ua fai o tatou loto a e tu'u le finagalo o le Atua.

Mana'oga:

Tatou tatalo ina ia avea i tatou ma molimau fa'amaoni mo lana UPU. Tatou loto tetele e fa'atino le UPU a le Atua.

Aperila 30 – 06 Me

Fa'afetai:

Fa'afetai i le Atua i lona Alofa Silisili 'ese ua amanaia ai le fa'atauva'a o le tagata. I lona fa'aihoa mai o mea e manuia ai

Fa'ato'esega:

Tatou fa'ato'ese ona o lo tatou lē lagonaina o lona vala'au mai.
Ina ua maa'a o tatou loto e fa'alogo ia te Ia.

Mana'oga:

Tatou tatalo ina ia tumau pea lona alofa i luga o si o tatou atunu'u, aemaise o lana fanau fa'atuatua uma i le lalolagi. Tatalo ina ia manuia fe'au ma faiva ua auauna ai.

Me 07 – 13 2023.

Tusi Faitau: Fa'ata'oto 18: 22
Manatu Autū: “O E UA MAUA LE AVĀ, UA MAUA E IA
LE MEA LELEI”
(He who finds a wife, finds a good thing)

Fa'afetai:

Fa'afetai i le Atua ona o ā tatou tinā. Fa'afetai i le sao o tinā ua manuia ai Aiga, Nu'u ma le Ekalesia.

Fa'ato'esega:

Tatou fa'ato'ese ona ua lē fa'amaoni tinā i o latou tiute. Tatou fa'ato'ese ona o le sauāina pea o tinā i totonu o aiga ma le lalolagi.

Mana’oga:

Tatou tatalo ina ia manuia tinā uma o Samoa. Tatou tatalo ia maua pea e tinā le fautua lelei.

.Me 14 – 20 2023.

Tusi Faitau: **Luka 13: 34**

Manatu Autū: **“ALOFA FA’A-TINA O LE ATUA”**
(Motherly love of God)

Fa’afetai:

I le alofa fa’-a-tinā o le Atua e fa’avavau lona fa’amaoni mo i tatou le fanau a tagata. Fa’afetai i le na alofa na fa’afofoa ai le ola, na fa’amoemoe i ai le ola ma fa’atumauina ai le ola mo mea uma.

Fa’ato’eseaga:

Ua lē atagia lena alofa ina ua laveia i tatou i le manatu fa’apito ma le va’ai maualalo. Ua galio fo’i lena alofa, ina ua tatou maua le malosi, o le tamaoaiga ma le poto.

Mana’oga:

Ina ia atagia le alofa fa’-a-tinā o le Atua i le ola fetausia’i i totonu o Aiga, Nu’u, le Malo ma lana Eklesia. Ia a’oa’o mai lenei mafaufauga, ia sufī ai loto e alolofa fa’amaoni ai i le Atua, e ala i o tatou Vala’auina.

Me 21 – 27 2023.

Tusi Faitau: **Fa’ata’oto 27: 2**

Manatū: **“IA VI’IA LE ATUA A E LE O I TATOU”**
(Praise God, not us)

Fa’afetai:

Fa’afetai i le Atua i mea e tele ua ia saunia mo i tatou. Ona o le alofa tu’u avanoa o le Atua, e ui ina tatou o ‘ese so’o mai ia te Ia.

Fa’ato’eseaga:

Fa’ato’ese ona o le fa’asēsēina pea o le tagata i le ola fia viia.

Mana’oga:

Tatou tatalo ina ia fa’atumauina pea le vi’iga i le Atua a e ‘aua mo le tagata. Ia tatou taumamao ma le ola fa’-a-fiasili e fano ai.

Me 28 – Iuni 03 2023.

Tusi Faitau: **Esoto 12: 17, 26 - 27**

Manatu Autū: **“SE ASO E MANATUA PEA”**
(A day to remember)

Fa’afetai:

Fa’afetai i le Atua ona o le sa’ili mālō o tuaā ua mavae. Fa’afetai ona o lona alofa ia Samoa. Ona o le sa’olotoga e manatua pea.

Fa’ato’eseaga:

Tatou fa’ato’ese ona o lo tatou lē manatua o le alofa o le Atua. Ona ua vale tu’ulima le sa’olotoga na tapenaina e ō tatou matua.

Mana’oga:

Tatou tatalo ina ia a’oa’o mai ananafi mo le asō, e fa’atonu ai tupulaga mo ā taeao. Tatou tatalo ina ia o tatou lagona le sa’olotoga, na fa’asaolotoina ai i tatou e Keriso.

Iuni 04 – 10 2023.

Tusi Faitau: **Luka 6:32 - 38**

Manatu Autū: **“O LE FUΑ E FUAINA ATU E FUAINA MAI”**
(What goes around comes around)

Fa’afetai:

Tatou fa’afetai ona o manuia sasa’ā mai o le Atua, Fa’afetai i lona finagalo lē taui ma sui i lo tatou leaga.

Fa’ato’eseaga:

Tatou fa’ato’ese ona o mea lē lelei ua o tatou faia ua a’afia ai isi uso a tagata. Tatou fa’ato’ese ona o lo tatou manatu fa’apito ma le va’ai maualalo.

Mana’oga:

Tatou tatalo ina ia maua e lana fanau fa’atuatua le agaga o le fai mea sili mo ia. Ia fa’ama’ite e le Agaga mea uma tatou te faia.

Iuni 11 – 17 2023

Tusi Faitau: **Filipi 4:19.**

Manatu Autū: **“SAUNIA E LE ATUA MEA UMA MO LONA FA’AMOEMOE.**

(God provides all according to His will)

Fa’afetai:

Fa’afetai ona o mea uma ua Ia saunia e ala i o tatou laufanua. Ona o mea ua fa’ā-tamaoaigaina ai i tatou i le tino ma le agaga.

Fa’ato’esega:

Tatou fa’atoese ona o lo tatou fa’atalalē i le tele o lona alofa. Fa’ato’ese ona ua tatou fao le vi’iga o le Atua ona o le ola fa’amaualuluga.

Mana’oga:

Tatalo ina ia fa’amanuia mai le Atua i le si’osi’omaga e tua i ai le tagata. Tatou talitonu pea i lona alofa fa’asoai mai.

Iuni 18 – 24 2023.

Tusi Faitau: **1 Peteru 4: 10 - 11**

Manatu Autū: **“AUAUNAGA MA ANA MEAALOFA FA’A-LE-AGAGA”**
(Service and His gifts)

Fa’afetai:

Fa’afetai ona o ana meaalofa ua fa’ā-au’upegaina ai i tatou mo ana fe’au. Ona o agava’ua mafai ai ona fa’atino auaunaga ‘ese’ese.

Fa’ato’esega:

Ona o lo tatou ola tusitusi lima. Fa’amaualalo ona o lo tatou lē fa’aaogaina ma le tatau o ana meaalofa.

Mana’oga:

Tatalo ina ia fa’amanuia mai le Atua i le soifua tautua o ona tagata. Ia manuia le galuega lavea’i a le Ekalesia mo ona tagata. Tatalo ina ia fiafia pea le tagata e auauna auā se vi’iga o le Atua

Iuni 25 – 01 Iulai 2023.

Tusi Faitau: **Esoto 14: 10 - 18.**

Manatu Autū: **“O LE MALAGA E ALU PEA”**

(The Journey continues...)

Fa’afetai:

Fa’afetai i le Atua ona ua tatou aulia mai le masina lona fitu o lenei Tausaga. E ui o i ai pea mala ma puapuaga o tuliloaina lo tatou ola, a e o lona alofa e lē o mavae ia Samoa, ma ona tagata.

Fa’ato’esega:

Fa’ato’ese ona o lo tatou fefefe gofie i fitā o lo o tatou fesagai i la tatou malaga faifai pea. O lo tatou lē mautonu i lona auai mai, ua faigata ai ona tatou manumalo i mea fa’atauva’a.

Mana’oga:

Tatalo ina ia agalelei mai le Atua ia muā’au ma muli’au i la tatou fōlāuga o faia nei. Tatalo ina ia manuia uma ē o Ta’ita’i malaga atoa ma ē o faimalaga i le fa’asinoga a le Agaga Paia

Iulai 02 – 08, 2023.

Tusi Faitau: **Numera 13: 30; 14: 1 - 4.**

Manatu Autū: **“MALAGA MA LE LOTOTELE MA LE FA’ATUATUA”**

(Journey with bravery and Faith)

Fa’afetai:

Ona o le a’oa’o mai pea o le Tusi Paia i le iai pea o le Atua i a tatou malaga fa’ā-le fa’atuatua, pe ā fetai’ai ma mea faigata. O le

soifua o ē na muamua ua a'oa'oina ai fo'i i tatou ia talitonu i le mana fa'aola ma le laveai mai o le Atua i a i tatou.

Fa'ato'esega:

Ina ua tatou fa'alagolago fo'i i lo tatou malosi, a e fa'atuatuanā'i ai le alofa o le Atua pe ā sōūā le tai. Ona e muamua ona tatou fefefevale pe ā fa'amalumalu mai mea e lamatia ai le ola.

Mana'oga:

Ia fa'apupulaina o tatou mata fa'a-le-agaga, ina ia manino la tatou va'ai i lana ta'ita'iga e tupu ai le fa'atuatua. Ia 'ave'esea e le Atua lo tatou fa'avaivai ma le pala'ai pe ā fotu mai fitā o le ola. Ia maua'a lo tatou talitonuga ma le fa'atuatua, ma aumai le loto tele e mafai ai mea uma.

Iulai 09 – 15 2023.

Tusi Faitau: **Kenese 27:29, 41.**

Manatu Autū: **"O LE LATALATA MAI IA TE 'OE, NA TE TOE FA'ALATAINA OE"**
(One who is closer to you, shall betray you)

Fa'afetai:

Ona o lana Afioga Paia o a'oa'o mai ai ina ia o tatou mata'alia i le latalata mai o le fili. Ina ia tatou iloa e i ai lava le ma'atui ma le ma'agao fa'alāvea a'ao i o tatou lotoifale. Ina ua tatou iloa e lē mativa le Atua e ou Tofiga mo i tatou uma.

Fa'ato'esega:

Ona ua ama la tatou va'ai i le latalata mai o mea e fa'alataina i tatou, a ua lilo i la tatou va'ai. Ona o nisi fo'i taimi ua fāoa lava o tatou manuia ona o mea fa'atauva'a ua tatou momo'o i ai. Ona ua avea tiga ma le fa'alumaina a e ua pogisa la tatou va'ai i manuia o i le lumana'i.

Mana'oga:

Ia toto'a ma matala la tatou va'ai i fa'ai'uga tatou te to'ilalo ai. Afai fo'i e fāoa o tatou tofi ma manuia, ia tatou mautinoa e lē mativa le Atua i lana fa'aso. Ina ia 'aua le teuina i o tatou loto mea tiga; ia maua le loto fa'amagalo i lē ua agaleaga mai.

Iulai 16 – 22, 2023.

Tusi Faitau: **Esekielu 38: 1 - 6**

Manatu Autū: **"O LE ATUA E LAVEA'I MAI I O TATOU PUAPUAGA"**
(God who deliver us from our afflictions)

Fa'afetai:

Auā e i ai mea tatou te lē mafaia i lo tatou malosi, a e mafaia i le fesoasoani mai o le Atua. Ona ua fai pea le Atua ma o tatou Māluāpapa i so'o se mea. Auā e maua lo tatou to'afilemu ma le mafanafana i le mautinoa e lē tu'ulafoa'iina i tatou e le Atua.

Fa'ato'esega:

Ona o le vave o le fefe ma le fememea'i i taimi o faigata. I le itiiti o le fa'atuatua i le auai mai o le Atua e ala i lona Agaga Paia na te fa'asino i tatou i le ala tonu. Ona e muamua ona sa'ili fesoasoani i tagata, a e mulia'i sa'ili i le Atua e ou le mana uma lava.

Mana'oga:

Ia avea pea le Atua ma sili'aga muamua i taimi e lē taugālēmu ai. Ia manino la tatou fa'alogo ma le va'ai i le fa'atonu mai o le Agaga Paia. Ia 'aua le maluelue lo tatou talitonuga i le mana fa'aola o le Atua, i taimi o puapuaga.

Iulai 23 – 29 2023.

Tusi Faitau: **Mataio 28: 16 - 20.**

Manatu Autū: **"E I AI LE ATUA MA I TATOU I ASO UMA LAVA"**
(God is with us everyday)

Fa'afetai:

Ona o le mautinoa o lo o fa'atasi mai le Ali'i ma i tatou i aso uma lava. Auā e silafia e le Atua galuega uma tatou te faia, ma lona fa'amalosi mai i o tatou tiute. O Ia lava na te fa'atonu mai, ma fa'aatoa i taou mo lona finagalo.

Fa'ato'esega:

Ona o le atagia pea i o tatou uiga ma upu lalafo, e lē o i ai le Ali'i ma i tatou. Auā ua na o se upu avane ai i o tatou manatu le auai mai o le Agaga Paia ia i tatou i aso uma. Ona o le tele o taimi, e lē o āfea le Atua auai mai, i a tatou fuafuaga ma filifiliga.

Mana'oga:

A'oa'o mai ina ia o tatou lagona ma talitonu o lo o lotolotoi o Ia i a i tatou. Ia pupula o tatou mata fa'a- le-agaga i le tele o Vavega ua Ia faia, ma fa'atupu tele ai lo tatou talitonu ma le fa'atuatua. Ia fa'a-au'upegaina i tatou e molimau i le Atua auai mai.

Iulai 30 – Aokuso 05, 2023.

Tusi Faitau: **1 Ioane 1: 1 - 5.**

Manatu Autū: **"MANATUA LE AMATAGA O LE FA'AOLATAGA"**
(Remember the beginning of Salvation)

Fa'afetai:

Ona le molimau mautinoa e pei ona tu'ufa'asolo mai e ulua'i so'o o ē na militino ma Ia e ala ia Iesu Keriso. E le gata ua fa'asoa mai lea Talalelei, a ua auai fo'i ma i tatou i lona manuia e fa'avavau. Ona ua avea fo'i i tatou ma ona so'o tatou te fa'aauau ona tala'i atu lona malamalama.

Fa'atoesega:

Ona tatou te lē manatua le tala i ulua'i kerisiano na asaina le taeao o le Talalelei. Ona tatou te tauaso i meaalofa fa'a-le-agaga sa molimau i ai ē na mafuta fa'atasi ma le Atua e ala ia Iesu Keriso.

Mana'oga:

Ia fa'amalosia i tatou i le molimau ola o le mana o le Atua na ala mai ia Keriso, e pei ona molimau i ai i latou na va'ava'ai ma fetagofi i ai i lea mana. Ia fa'aalia mai e le Atua lona finagalo e pei ona faia e Iesu i le amataga, ina ia fa'atumauina ai le ola fa'atuatua ia te Ia.

Aokuso 06 – 12. 2023.

Tusi Faitau: **Fa'amasino 16: 16 – 21.**

Manatu Autū: **"E TU'ITU'I PEA LE FILI INA IA O TATOU FAIAINA"**

(The enemy shall keep knocking so that we lose)

Fa'afetai:

Ona o le usaitai ma le fa'atuatua, ua tau'aveina ai taleni ua aumaia mo i tatou. E tuliloaina pea i tatou e lona Alofa Tunoa, e ui ina tatou taumamao ma lo tatou Vala'auina.

Fa'ato'esega:

Ona ua fai o tatou loto a e lē fa'alogi i le ta'ita'iga a le Agaga. Ona o le avagagofie o le loto i le matagofie o le lalolagi e faigofie ai ona to'ilalo i le fili. Pei lava o Samasoni, e toe sālāmō ane ua ave'esea mea alofa a le Atua na foa'iina mai.

Mana'oga:

Ina ia maua'a lo tatou fa'atuatua i le Atua, ia manino la tatou va'ai fa'a-le-agaga. Ia tatou mataala auā e lē moe le fili. Fesoasoani mai le Atua ina ia tatou gaua'i atu ia te Ia ma lana Galuega ma tete'e atu i ala o le lalolagi.

Aokuso 13 – 19 2023.

Aso Sa o Tama

Tusi Faitau: **Salamo 122.**

Manatu Autū: **TA'ITA'I LE AIGA I LE FALE O LE ATUA**
(Lead the family to the house of God)

Fa'afetai:

Ona o Tamā ma o latou tiute fa'a-Ta'ita'i i totonu o aiga, nu'u, aulotu, o lo o fa'amalumalu i le ola fa'a-le-agaga. Ona o lo o sologa lelei pea le galuega tala'i a le Ekalesia i totonu o alalafaga. Ona o pulega a ali'i ma faipule o lagolago i le galuega a le Atua.

Fa'ato'esega:

A fāoa i le ta le tōfā ma le fa'aūtaga i le 'au galulue i le tovine, ona avea lea ma mea e fulitua mai ai le fanau a le Atua. Ona o nisi taimi ua tatou ta'ita'i ese le lafu mamoe mai le fale o le Atua, e ala i o tatou uiga ma upu lafo. Ina ua lē atoa lo tatou tali atu e ala i tiute ua tu'uina mai tatou te faia.

Mana'oga:

Ia lagona le tāua o le tofia o i tatou, ina ia o tatou ta'ita'i atu le lalolagi ia te Ia. Ia tatou maua le olioli ina ia fai i tatou ma Faifaiva mo le mālō o le Atua. Ia o tatou iloa ma malamalama i Vavega na te faia i aso uma, ia fa'amalosia ai le fa'atuatua.

Aoukuso 20 – 26 2023.

Tusi Faitau: **Filipi 3: 12 - 14.**

Manatu Autū: **"FA'AGALOGALO I MEA UA TUANAI,
FINAU I MEA O LUMANAI"**

(Forgetting the past, straining forward to what lies ahead)

Fa'afetai:

Ona e lē muta le fa'amoemoe o le kerisiano i mea ua tuana'i, a e taula'i pea le va'ai i le lumana'i, pe a o'o mai le fa'aatoaina. Aua ua uma ona savalia e Iesu le ala o tatou ui ai nei, ma ua Ia manumalo ai.

Fa'ato'esega:

Ona ua tatou taofi mau pea i mea lē aogā ua tuana'i, ona maumau ai lea o manuia o fotu mai pea.

Mana'oga:

Ia fa'atonu mai i tatou e le Agaga ia tu'u ese mea ua lē lelei ona tatou fai. Ia tupu pea lo tatou mautinoa o lo o fa'atonu le Atua i o tatou ala uma. Ia tatou iloa o mea tiga, e fai ma avega mamafa, pe a tatou lē lafoa'i. Ia o tatou iloa le ola fa'amagalo atu, e pei ona fa'amagaloina i tatou e le Ali'i.

Aokuso 27 – Setema 02 2023.

Tusi Faitau: **Mareko 9: 25 - 29.**

Manatu Autū: **"TATOU TE MAFAIA MEA UMA I LE
TATALO"**

(We can do all things through prayer)

Fa'afetai:

Ona o le tatalo ua fa'asino mai tatou te feso'ota'i atu ai i le Atua ma tatou mafaia ai mea faigata uma. Ua tatou mautinoa o lo o fa'afogaina lava e le Atua a tatou tatalo uma. Ua a'oa'oina fo'i i tatou mai le soifuaga o lo tatou Ali'i o Iesu, e fautua i le Atua le Tamā mo i tatou.

Fa'ato'esega:

Ona e muamua ona tatou popolevale i mea e tutupu a e mulimuli ane fa'atoa tatalo mo le fa'asinoga a le Atua. Ua fa'amuamua la tatou va'ai i lo tatou lava malosi a e fa'atuatuanā'i le mana o le Atua. Ua vaivai lo tatou ola tatalo.

Mana'oga:

Fesoasoani mai ina ia o tatou matuā lagona le fa'afogaina mai o le Atua i ā tatou tatalo. Ia fa'ataunu'uina ma fa'atāuaina Sauniga Tatalo e lē gata o le 'Au-Lotu aemaise fo'i o aiga i aso ta'itasi uma. Ia tatou mautinoa tatou te mafaia lava mea uma i le tatalo.

Setema 03 – 09 2023.

Tusi Faitau: **Mataio 28: 16 - 20.**

Manatu Autū: **“O LE POLOA’IGA MO I TATOU”**
(The Commission for us)

Fa’afetai:

Ona o le totolfi mai e le Ali’i o i tatou e fa’aaaua ana poloaiga. Ona o le mautinoa o le manumalo o Keriso i le otī, o lea fo’i le mana tatou te faia ai lana Galuega. E lē o tu’ulafoa’iina i tatou, o lo o fa’atasi mai pea o Ia i aso uma lava.

Fa’ato’esega:

Ona e tele taimi ua fa’atamala ai ona fa’atinoina lana poloaiga. Ua tatou lē fa’amoemoe i lona fa’atonu mai, a ua faia lava lo tatou atamai. Ua lē lagona, o Tofiga uma i totonu o le Ekalesia ma Aulotu, o vaega uma ia o le Poloaiga a le Ali’i.

Mana’oga:

Fa’atonu mai le Agaga ia iloa lona a’oa’o mai. Ia foa’i mai le loto fa’amaoni. Ia lagona le tāua o le totolfi mai o le Ali’i i ā i tatou.

Setema 10 – 16 2023.

Tusi Faitau: **Ioane 3: 28 - 30.**

Manatu Autū: **“O IESU LE FA’ATOĀFAIAVĀ, O I TATOU O ANA UO”**
(Jesus is the Bridegroom, we are his friends)

Fa’afetai:

Ina ua avea i tatou ma so’o ma uō a le Ali’i, le Ao o le Ekalesia. i lona alofa sa’ili mai ua talia ai le tagata i lana Tausama’aga, e nofo tupu ai fa’atasi ma Ia. O le fa’atusaina o i tatou o ana uō, o se fe’au ua mautinoa ai, e ō le malo o le Atua i tatou, pe ā talitonu ma fa’atuatua.

Aso Sa o le Talalelei

Fa’atoesega:

Ona ua lē atagia i ā tatou amio ma fa’atinoga, o i tatou o uō a lo tatou Ali’i. Tele taimi ua pei ai i tatou o le Fa’ato’āfaiāvā, a o Iesu le uō. Ua tatou lē iloa o le tofi o le uō e ‘ai’aiuli i le Ali’i.

Mana’oga:

Ia fa’atonu mai le tāua o le vala’auina o i tatou e avea ma ana uō, e i ai tiute tatou te fai. Ia manatua o le uō e mulimuli ma fa’alogo i le Fa’ato’āfaiāvā, auā o Ia o le ‘auga o ‘aute o le Tausama’aga.

Setema 17 – 23 2023.

Tusi Faitau: **1 Korinito 13: 4 – 10.**

Manatu Autū: **“E PEI O SE TAIMANE MATAGOFIE E LASI ONA TAFA, E FA’APEA FO’I LE ALOFA”**
(Like a beautiful Diamond with many sides, so is Love)

Fa’afetai:

Ona o le a’oa’o mai o le Afoga a le Atua i uiga loloto ma tafa ‘ese’ese o le Alofa. Ona o tamaoaiga fa’a-le-Atua o afifi i le alofa. Ona o le amio a le tagata fa’atuatua e lima ta’ita’iina ma fa’atonu folau e le alofa. Ona o le alofa, o lo’o fealofani ai aiga, ma maopoopo ai Nu’u ma Ekalesia.

Fa’ato’esega:

Ona ua tatou popoto e fa’amatala uiga ‘ese’ese o le alofa, a ua faigata ona fa’atino ma ola ai. Ina ua tausolomua lava i le kerisiano ona tautala i le alofa, a e solomua fo’i le faia o amio mātāgā ma le fa’asausili.

Mana’oga:

Ia fa’atupu tele mai e le Atua lo tatou alofa pei fo’i ona alofa mai o le Atua i le lalolagi. Ia manino lo tatou iloa ma lo tatou fa’anaunau i tafa matagofie ‘ese’ese o le alofa. Tatalo ina ia a’oa’oina ai a tatou fanau i le alofa.

Setema 24 – 30 2023.

Tusi Faitau: **Numera 22: 23 - 33.**

Manatu Autū: **“INA NE’I PUPULA ASINI A E TAUASO LE TAGATA”**
(Lest donkeys see while people are blind)

Fa’afetai:

I le Agaga Paia o le Atua o lo o fa’atonu ma musuia i tatou ina ia o tatou iloa lona finagalo. Ona e tele taimi e pogisa ai i tatou i se fa’ai’uga amiotonu fa’a-le-Atua pe lilifa manatu i le tamaoaiga ma mamalu fa’a-le-lalolagi. Fa’afetai i le fesoasoani mai o le Agaga o le Ali’i ua pupula ai o tatou mata fa’a-le-agaga.

Fa’ato’eseaga:

Ona e tiga lava ona tatou iloa le mea moni a ua ‘alo’alosā ai a tatou fa’ai’uga e pei fo’i o Pala’amo. I lo tatou te’ena o le musumusuga a le Agaga, a e lolo’u mai le finagalo o le Atua i o tatou lava mana’o. Ona ua fa’aaoga le finagalo o le Atua, e la’ei i o tatou tu’inanau.

Manao’ga:

Ina ia tatou manatua lenei tala i le Perofeta ua fa’atauasoina, ma le asini ua pupula ma fa’a-gaganaina. Ina ia o tatou manatua, e i ai taimi e ala mai ai le finagalo o le Atua i tagata fa’atauva’ a ma mea o le foafoaga. Ia tatou to’ a’aga e tatalo ma sa’ili pea, pe se ā le fingalo moni o le Atua.

Oketopa 01 - 07.

Tusi Faitau: **2 Samuelu 1: 21 - 27.**

Manatu Autū: **“AU’UPEGA MAUMAU”**
(Perished Weapons)

Fa’afetai:

Ona o au’upega o le Galuega ua fa’a-tamaoaigaina ai i tatou. Ona o le fesoasoani mai o le Agaga e maua ai le malosi ma le loto tele. I le Suafa o Iesu Keriso, o le au’upega sili lea mo le Galuega.

Fa’ato’eseaga:

Ona o le lē usita’i i le Ao o le Eklesia. Ua maumau au’upega o le Talalelei ona o le fa’atamala. Ona o le sa’ili fesoasoani i le lalolagi, a e fa’atuatuanā’i lē na totofi mai. Ua lafoai’ina le faigaluega ma ana au’upega ua lē fa’atali i le fa’asinog a le Agaga.

Mana’oga:

Fa’atonu mai lo tatou ola auauna, ina nei valetu’ulima au’upega ua aumai. Ia maua le fa’atuatua ma le fa’amaoni, o isi ia o au’upega tāua. Alofa mai le Atua ina nei tō i moana lana au’upega o le Talalelei, ona o lo tatou fa’atamala.

Oketopa 08 – 14 2023.

Tusi Faitau: **Ieremia 18; 6.**

Manatu Autū: **“O FANAU E PEI O LE OMEA I LIMA O LE FAI IPU OMEA”**

(Children are like clay in the Potter’s hand)

Fa’afetai:

Fa’afetai ona o le mea-alofa tāua i fanau ua foa’iina mai. Ona o le tiute fa’a-matua e tausi, ma a’oa’o, ma saunia fanau ia o latou iloa le Atua. Ona o le olioli e maua i le i ai o se fanau i se aiga, latou te fa’auau gafa o aiga.

Fa’ato’eseaga:

Ona ua fa’atamala matua ma aiga a’emaise le Eklesia i le tapenaina o fanau mo le lumana. Ina ua toatele fanau ua sauāina i totonu o le sosaiete. I le faiaina o matua i le faatinoga o latou tofi

Mana’oga:

Ia lagona e matua ma aiga ma le eklesia lo latou tiute fai fa’atasi mo le tausia ma le ola manua o fanau. Ia fa’amanuiaina fanau i lo latou taumafai i a’oa’oga. Ina ia una’iina pea fanau i ala e manua ai. Ia fa’amalosia lo latou ola fa’a-le-agaga ma ia fiafia i le Ali’i. Ia manatua e tagata uma, o le fa’atonuina o fanau, o nafa tausi ia o tagata uma.

Oketopa 15 – 21 2023.

Tusi Faitau: **Iopu 38: 1 - 13.**

Manatu Autū “**O O TATOU MANATU E LE O ALA IA O LE ATUA”**
(Our thoughts, are not the ways of God”

Fa’afetai:

Ona o ona ala, e ui ina faigata, a e ua na fa’atonu ma fa’aali mai ai lona finagalo. O le ola felagolagomai, o le ata va’aria lea o le fa’aali mai o lona finagalo. Ona e tele ala e fa’aali mai ai, o lo o soifua pea o Ia fa’atasi ma i tatou i aso uma lava.

Fa’ato’esega:

Ona ua tele taimi ua fāoa ai e ō tatou manatu le finagalo o le Atua. Ona ua vaivai le ola tatalo ma le sa’ili atu i le Ali’i. Ina ua aumai le finagalo o le Atua e ala i ana Auauna tofia, a ua lē talia e le to’atele o tagata le finagalo o le Atua ua ala mai i ana Auauna totofi.

Mana’oga:

Fesoasoani mai ina ia faigofie ona tatou malamalama, o ala o le lalolagi, e lē o ala ia o le Atua. Ia fa’asino mai e le Ali’i le ‘ese’esega o so tatou poto fa’ā-le-lalolagi, ma ona ala e manuia ai. Ia o tatou maua le loto maualalo e talia ai, ua na o le Atua tatou te iloa ai mea uma.

Oketopa 22 – 28 2023.

Tusi Faitau: **Ioelu 2: 21 - 27.**

Manatu Autū: “**E LIUA LE FA’A-LAULAU-TOAFA, I LE FA’AMOEMOE MA LE FA’ATUMUINA”**
(The desert is turned into Hope and Fulfilment)

Faafetai:

Ona o ala manuia e tele ua saunia e le Atua i taimi faigata. I le tamaoaiga o le laueelele ma le sami mo le fofoga taumafa ma

seleni e maua ai. Ona o le ‘au Faifaiva ma le ‘au Faifa’atoaga ma nisi Atiina’e o fa’atino ai le fatu aiga tausi. Ona o Tamaita’i ma Ali’i Foma’i ma Tausisoifua, ma le Matagaluega o le Soifua Mālōlōina, i latou o muā’au i le puipuiga o Samoa mai fa’ama’i. Ona o Taulasea ma isi auaunaga o le soifuaga o tua i ai tagata mafataia.

Fa’ato’esega:

Ona o le paīē ma le fa’apalapala ua lē mafai ai ona galueaiina le tele o ‘ele’ele ua foa’i mai, mo le tausiga o aiga. Ina ua fa’aleagaina lava e tagata le ‘ele’ele, ona o vaila’au o’ona. Ona ua tele fo’i ina fa’alagolago i aiga i fafo, ua vaivai ai le ola galulue..

Mana’oga:

Ia a’oa’oina i tatou, e tupu le fa’atuatua i galuega, o lē fo’i e lūlū e selesele. Ia aumai pea e le Ali’i le malosi e galue ai ma finau i avanoa ua maua, a e lē na o le tatalo ma ta’oto’oto. Ia galulue ma le fa’atuatua, o tatou e tōtō a o Ia na te fa’atupu le lausiusi i nofoaga fa’ā-laualau-toafa.

Oketopa 29 – Novema 04 2023.

Tusi Faitau: **1 Nofoaiga Tupu 29: 1 - 11.**

Manatu Autū: “**A SAPI I MANUIA IA MANATUA LE GALUEGA A LE ATUA”**

(When blessed, remember the Work of God)

Fa’afetai:

Ona o le tele o manuia ua foa’i mai mo i tatou, e lē gata i mea e tausi ai le ola i le tino, a e fa’apea fo’i le tamaoaiga. Ona e mafai lava ona fa’asoia lo tatou ola ma manuia mo le Galuega a le Atua. Ona o le soifua galulue o tagata lotu i le lagolago pea i mea e fai a le Ekalesia ma le finagalo o le Atua.

Fa'ato'esega:

I lo tatou limamau i meaalofa ua maua mo le Galuega a le Atua Ona o lo tatou vala'au pea i le Atua mo se manuia, a e lē lagona le tali atu e lagolago lana Galuega.

Mana'oga:

Ia tatou lagona le fa'afetai i le alofa ma le fa'amaniua mai o le Atua, ma ia atagia lea fa'afetai e ala i ā tatou galuega. Ia a'oa'o mai le Ali'i i le tāua o le fai Taulaga i le Atua i so'o se ala. Ia fa'aaogaina ma le tatau le tamaoaiga ua foa'iina mai mo le Galuega a le Atua.

Novema 05 – 11 2023.

Tusi Faitau: **1 Nofoaiga Tupu 21: 18 - 27.**

Manatu Autū: **"OU TE LE FAI-TAULAGA I LE ALI'I
I NI MEA MAUA FUA"**

(I will not offer sacrifices to the Lord, with something that cost me nothing)

Fa'afetai:

Ona o lo o maua pea e tagata lotu le fiafia e fai-taulaga i le Atua, o le fa'ailoga o le ola fa'atuatua. Ona o le tamaoaiga tatou te maua e fai-taulaga ai i le Atua i Tausaga uma. Ona e avea fo'i Faigā Taulaga e galulue fa'atasi ai matua, fanau ma le aiga uma ina ia faia se Taulaga lelei mo leAli'i.

Fa'ato'esega:

Ona o nisi taimi ua tatou muimui ai i Faigā Taulaga mo le Atua, a ua galo lona alofa foa'i mai mo i tatou. Ona o le fa'atalalē ma le paīe e galue mo se mea e faitaulaga ai. Ona o nisi taimi ua osi ai a tatou Taulaga i mea maua fua, tatou te lē o matuā lagona tele ai le suāmalie o le agaga faitaulaga i le Atua na mua'i alofa mai.

Mana'oga:

Ina ia o tatou iloa e sili ona manogi i le Atua le Taulaga na faia ma ofo atu mai fua o ā tatou lava galuega ma lo tatou malosi. Ia maua se vi'iga o le Atua i ā tatou fe'au ma Taulaga e faia mo Ia. Ia avea fo'i le ola fai Taulaga o tagata o le Ekalesia o se fatu e tōtō i isi o tau fa'avaivai.

Novema 12 – 18 2023.

Tusi Faitau: **Luka 15: 8 - 10.**

Manatu Autū: **"E FINAGALO LE ATUA IA TATOU SALAMO"**

(God wants us to repent)

Fa'afetai:

Ona o le tu'u avanoa mai o le Atua e talia ai le tagata agasala pe a sālāmō. Ona o lana Fa'aolataga ua avanoa ai tagata uma pe a talia o Ia ma le fa'atuatua. Ona o le fa'amaoni o lona alofa e sa'ili mai, a o tatou agasala pea.

Fa'ato'esega:

Ona o le ma'a'a o tatou loto, tiga lava ona tatou iloa o lo o tatou faia le agasala a ua lē mafai ona tatou sālāmō. Ona o lo tatou finau vale i mea ua tatou le 'ausia, ona fai ai lea o isi auala sesē ma le lē amiontonu. Ona o lo tatou fa'aaoga o le Suafa o le Atua e teuteu lumāfale ai a tatou amio matagā.

Mana'oga:

Ia o tatou lagona o tatou uiiga lē amiontonu, ma ia tatou sālāmō fa'amaoni ai. A'oa'o mai ina ia o tatou 'alo 'ese mai le fa'atau matatao i le amiontonu a le Atua.

Novema 19 – 25 2023.

Tusi Faitau: **Tito 2: 1 - 2.**

Manatu Autū: **“IA FA’A-TOEAINA LE TOFA; IA FA’AUTAUTA MA FA’ATUATUA”**

(Be like older men in being temperate; be prudent and faithful)

Fa’afetai:

Ona o le tamaoaiga o la tatou aganu'u ua fesoasoani tele i le fo'ia o fa'afitauli i le va o tagata. Ona o le fa'asinoala i agaifanua e pei o le fa'aaloalo, le āva fofoga, ma le āva fatafata, o gafa feso'otai ma nafa tausī o tagata uma ua va'ava'alua ma le Talalelei.

Fa'ato'esega:

Ona ua avea le naunau i tofi ma le tamaoaiga ua oia ai le galulue va'ava'alua a le Talalelei ma le Aganu'u. Ona o le gagana lē tau tamāali'i ua iloa ai le leai o se tōfā fa'a-toeaina.

Mana'oga:

A'oa'o mai ina ia fa'atāua pea le Aganu'u na tausia ai le mamalu ma le fealofani o Samoa i aso ua mavae. Ia iloa ona a'oa'oina fanau i le tausiga ma le fa'a-tāuaina o mātua, o ē o i ai le tōfā fa'a-toeina. Ia lagona e tagata o latou nafa tausī fa'a-le-Aganu'u ma le fa'a-Ekalesia mo le manuia lautaele.

Novema 26 – Tesema 02 2023

**Aso Sa o le Etiveni; Advent ends Sunday 24 December.
(Advent last 4 weeks and ends on Christmas eve. It is a period when Christians get ready and prepare to receive Christ)**

Tusi Faitau: **Mataio 3: 1 - 3.**

Manatu Autū: **“TAPENA LOU TAGATA MO LE AFIO
MAI O LE MESIA”**

(Prerare yourself for the coming of the Messiah)

Fa’afetai:

I le ta'ita'iga a le Atua i le Malaga umi o lenei Tausaga, auā o lea ua i'ite fanuālalo ma sauni e talia le afio mai o le Fa'aola. Ona o lagona o le olioli i lenei vaitau o le tausaga, a o lumana'i ai le fa'amanatuina o le Fa'aolataga. Ona o le vaitau o le Etiveni, e saunia ai fa'a-le-agaga mo le afio mai o Keriso.

Fa'ato'esega:

Ona o o tatou uiga ma fa'atinoga ua lē atagia ai lo tatou ola fa'afouina. Ona o le lē nofo sauni ma tapena i le a'oa'o mai pea o le fe'au ma Vavega a Iesu. Ina ua se'e 'ese le fa'amamafa o le vaitau o le Etiveni, mai le saunia fa'a-le-agaga o i tatou mo lona afio mai.

Mana'oga:

A'oa'o mai ina ia tumau le agaga o le Etiveni ma ia fa'amuamua mea e sili ona tāua. Ia manatua o le ola tapena mo le Ali'i e lē faia na o le vaitau o le Etiveni, a e mo aso uma e ola ai. O le ola tapena mo le Atua e iloa i fa'atinoga a e lē na o upu.

Tesema 03 – 09 2023.

Tusi Faitau: **Mataio 26: 41 - 46.**

Manatu Autū: **“SOIA LE TULEMOE UA I FAITOTOA
LE FILI”**

(Do not slumber; the enemy is at door)

Fa’afetai:

Ona o le fa'amalosi mai pea o le Agaga i taimi o lo tatou fa'atamala ma le tulemomoe. Ona o le ola fa'atuatua ua lē manumālō ai mana'oga o le tino, ma amioga a le lalolagi. Ona e fafagu mai pea le Agaga i lo tatou lē onosa'i ma mataala i taimi e sili ona tāua.

Fa'ato'esega:

Ona ua tatou lē lavatia ona mataala fa'atasi ma le Ali'i. Ona ua avea le tulemoe ma le fa'a-tu'utu'u ma ala e mele ai taimi e fetalai

mai ai le Ali'i. Ua avea le fa'atalale ma fa'amoemoe i le ta'ita'iga a le lalolagi ma ala ua o tatou o 'ese ai mai le Ali'i.

Mana'oga:

Fa'atonu mai le Atua ina ia o tatou mataala ne'i fa'asēsēina i tatou e le tiapolo. A'oa'o mai le Agaga ina ia o tatou mataala ma iloa le 'ese'esega o le amiontonu ma le agaga taufa'asēsē. Ia lē gase i tatou i le tuimoe a le tiapolo, ina ne'i o tatou ta'ita'i sēsē ai aiga.

Tesema 10 – 16 2023.

Tusi Faitau: **Luka 19: 1 - 5.**

Manatu Autū: **"E AFIO MAI LE ALI'I I LOU FALE PE A E SAILI ATU"**

(God comes to your house when you search for Him)

Fa'afetai:

Ona e silafia e le Atua lo tatou sa'ili atu. Ona e lē tuliloaina e le Ali'i o tatou vaivaiga, a e afio mai tatou te talisua ma Ia i lou fale. Auā na afio mai le Ali'i mo ē mama'i ma ē agasala e pei o i tatou. Auā a tatou sa'ili atu, e sa'ili mai fo'i le Ali'i mo i tatou.

Fa'ato'esega:

Ona ua tatou augatātā e sa'ili atu i le Ali'i. Ona e tele taimi e ui ane ai le Ali'i i o tatou ala, a ua tatou lē fia matamata ia te Ia. Ua lē maua le loto maulalo e ta'uta'u ai a tatou agasala.

Mana'oga:

Ina ia pu'epu'e maua avanoa tatou te mafuta ai ma le Ali'i. Ia tatou mata'alia e iloa ai lona afio mai e ala i le Agaga. Sa'ili pea i le Ali'i o lē silasila ma fa'amanuia mai.

Tesema 17 – 23 2023.

Tusi Faitau: **Salamo 122: 6 - 9.**

Manatu Autū: **"TATALO MO LE FILEMU O LE LALOLAGI"**

(Pray for Peace of the World)

Fa'afetai:

Ona o le ola tatalo e feso'ota'i atu ai ma nōnōmanū mo se filemu o le lalolagai. Ona o le a'oa'o mai o Iesu i le tatalo. Auā e fa'afogaina lava e le Atua a tatou tatalo.

Fa'ato'esega:

Ona o lo tatou sao i le fa'atupuina o le vevesi i aiga, le atunu'u ma le mālō. Ua o tatou lē fia tatalo ma sa'ili le filemu. Ona seiloga e o'o mai puapuaga ona fa'atoā manatua lea o le Atua o le filemu.

Mana'oga:

Ia manumalo le filemu o le Ali'i i le fia sili ma le fa'atupu vevesi. Ia fa'ato'ilaloina ala lē amiontonu, a ia tūmati'e le filemu ma le fealofani. Onosa'i pea ma tatalo i le fa'atonu mai o le Agaga.

Tesema 24 – 30 2023.

Tusi Faitau: **Mataio 1: 21 - 24.**

Manatu Autū: **"EMANUELU UA IA TE I TATOU LE ATUA"**

(Emmanuel, God is with us)

Fa'afetai:

Ona o le soifua mai o Iesu, ua auai mai ai le Atua i le lalolagi. Ona o le fa'aolataga na valoia mai e Perofeta, ua taunu'u lava i le fanau mai o Iesu. Ona o le Alofa Tunoa mo le lalolagi, ua saofāgā atu ai i tatou i le manuia e fa'avavau.

Fa'ato'esega:

Ua avea lo tatou masani i le galuega, ua fa'aititia ai le tāua o lē e ana le galuega. Ona na o upu ua fa'ailoa ai le auai mai o le Atua, a ua tau lē iloa i ā tatou amio.

Mana'oga:

A'oa'o mai ia lagona le fa'atasi mai o le Atua e lē gata i lenei vaitau o le Kerisimasi, a e ia fa'apea i aso uma lava. Ia atagia i ā tatou fa'atinoga le Atua alofa, mo isi o mana'omia le fesoasoani. Taualuga le tausaga i lona vi'iga, i le foa'iina mai o Iesu.